



[Halaman Utama](#) » [Sarawak](#) » Alam sekitar tanggungjawab bersama - Ahmad

Alam sekitar tanggungjawab bersama - Ahmad

© 2019-10-26T15:58:19+08:00



Ahmad ditemani tetamu kehormat lain menyampaikan hadiah kepada pemenang.

KOTA SAMARAHAN: Tanggungjawab memelihara dan memulihara alam sekitar bukan hanya terletak dibahu kerajaan tetapi menuntut jalinan kerjasama secara holistik daripada semua pihak.

Pemangku Pengarah Jabatan Alam Sekitar (JAS) Sarawak Ahmad Saiful Salihin berkata, jalinan strategik antara kerajaan dengan sektor korporat, pertubuhan bukan kerajaan (NGO), pertubuhan sukarela dan masyarakat umum amat diperlukan dalam memelihara dan memulihara alam sekitar di negeri ini.

"Saya ingin menyatakan di sini bahawa pihak JAS Sarawak amat menggalakkan penglibatan sektor korporat atau mana-mana pihak untuk mengadakan program bersama bagi meningkatkan kesejahteraan hidup dan pembangunan lestari.

"JAS Sarawak tidak mampu melaksanakan secara sendirian dan sentiasa mengharapkan jalinan kerjasama secara holistik daripada semua pihak," katanya.

Beliau berkata demikian ketika berucap pada majlis perasmian Program 'Battle Of The Eco Green Musicvibes and Aerobathon' sempena Hari Alam Sekitar Negara (HASN) Peringkat Sarawak 2019 di Pusat Belah Belah The Summer di sini hari ini.

Jelas Ahmad, ia bertepatan dengan slogan HASN tahun ini iaitu 'Alam Sekitar, Tanggungjawab Bersama'.

Dalam pada itu, beliau memberitahu, tema HASN tahun ini adalah 'Hindari Plastik Sekali Guna' yang mana JAS Sarawak dalam usaha untuk memberi kesedaran kepada masyarakat mengenai pengurangan penggunaan plastik dan amalan kitar semula bagi memelihara alam sekitar.

Dedahnya, isu alam sekitar berkaitan sisa plastik menjadi masalah utama di Malaysia yang mana negara ini diberikan kedudukan kelapan di antara 10 negara yang mempunyai pengurusan sisa plastik yang tidak terurus di dunia.

Tambahnya, pencemaran plastik merupakan masalah global yang perlu diuruskan secara mampan.

Malah, beliau berkata, Malaysia sentiasa menggalakkan pembangunan mampan dengan mengimbangi pembangunan ekonomi dengan perlindungan alam sekitar sejajar dengan hala tuju Sasaran Pembangunan Mampan Negara-Negara Bersatu (UNEP).

"Oleh itu, saya ingin menyeru agar rakyat Sarawak di negeri ini mengambil inisiatif untuk mula memainkan tanggungjawab masing-masing dan lebih komited dalam menjaga dan memelihara alam sekitar di negeri ini," ujarnya.

Selain sisa plastik, Ahmad berkata, JAS Sarawak juga sedang mengadakan kempen pengumpulan buangan elektrik dan elektronik atau 'e-waste' bagi mengelakkan ia dari dilupuskan sewenang-wenangnya dan mencemarkan alam sekitar serta memudaratkan kesihatan.

"Kami telah bekerjasama dengan beberapa pihak untuk menjalankan kempen ini bagi memudahkan orang ramai melupuskan buangan elektrik dan elektronik mereka.

"Semoga komitmen dan kerjasama yang terjalin ini akan berterusan bagi mewujudkan dan memperluaskan kesedaran alam sekitar kepada semua lapisan masyarakat khususnya di Sarawak," katanya.

Hadir sama Naib Presiden Kesihatan, Keselamatan dan Alam Sekitar Sarawak Energy Berhad Marconi Madai, Pengarah Institut Pendidikan Guru Kampus Tun Abdul Razak Anis Alisya Abdullah, Penolong Kontroler Kanan Lembaga Sumber Asli dan Alam Sekitar Sarawak Rahmah Biak, Pengurus Besar Sarawak Energy Robin Tigai dan tetamu kehormat lain.

👤 oleh Rusnan Mustafa

Kategori [Sarawak](#)